

Nan kier bin cu un pakete di seguro

ENNIA TA CONFIRMA CU NO TA SEGURA AUTO SO

ORANJESTAD(AAN) -- E noticia cu DIARIO a publica dia 9 di Januari 2001 a cay manera un baño di awa friu pa hopi hende den comunidad.

DIARIO a haya reaccion di un persona cu tin mas cu 30 aña segurando su auto na Ennia y awor a haya un carta cu si no tin un otro seguro pa forma e pakete cu Ennia ta yama "totaalrelaties" su seguro di auto lo cancela.

El a keda den Hospital pa dos siman..

E di cuatro hoben di accidente cruel a fayece

ORANJESTAD (AAN): E di cuatro joven envolvi den e desgracia serio y fatal na final di 2000 a fayece na Horacio Oduer hospital.

Ta trata di e joven Marvin Mares Humphry Reeder naci riba 30 di Mei 1979 y tabata biba na Hooiberg Kavel 27.

Marvin tabata riba Diamars 26 di December 2000 den oranan di marduga, hunto cu su amigonan Christopher Silvester Laclé, Dwayne Aldrich Croes y Andres Aureolo Krozendijk den e Tercel.

Pa un of otro motibo, e chofer a perde control riba Smith Boulevard na altura di ServiStar y a bay dal den un Montero. E impachto tabata asina fuerte cu Silvester, Dwayne y Andres a fayece al instante.

Marvin mes a ricibi slanan fuerte, pero a keda na bida. Sinembargo Docternan tabata teme pa su estado di salud.

Diamars pa 8:50 p.m. a drenta informe tristo na Central di Polis cu Marvin Reeder, e di cuatro persona envolvi den e desgracia na altura di ServiStar a fayece.

Docter van Setten a constata morto di e joven Marvin. Cu su morto, a sera aña 2000 cu e di 15 morto den trafico pa e aña ey. Na famia di e fayecido, DIARIO ta extende palabranan di profundo condolencia. Forza pa e dianan dificil y laga Marvin sosega na paz.

Relaciona cu e noticia di cu lo no segura auto so, ENNIA a manda un splicacion di e medida aki cual ta confirma e noticia di DIARIO.

Ennia a duna di conoce na DIARIO cu e portofolio di seguro di auto ta keda causa preocupacion y pesey Ennia kier introduci "relacion total" pa compensa su gastonan di daño cu ta hopi halto.

Ennia a splica cu meta di e maneho nobo di Ennia ta pa cera mas cu un seguro cu cada un di e clientenan actual y di futuro y asina yega na un "relacion total". Cu e concepto di seguro multiple, Ennia kier logra un relacion di termino largo, caminda e clientenan por haya descuentonan atractivo y otro beneficienan adicional.

Pa basta tempo e gremio di seguro na Antiyas Hulandes y Aruba, mescos cu otro sectornan comercial ta den un proceso di reorientacion intensivo.

Specialmente seguro di auto ta un fuente continuo di preocupacion pa companianan

local di seguro.

E companianan ta busca forman pa haci henter e explotacion rendabel y pagabel pa e cliente, e intermediario y nan mes.

Durante e ultimo añanan e sector como colectividad, pero cada un di e companianan di seguro riba su mes tambe, a tuma diferente medida pa logra un equilibrio comercial economico, sigur den e portofolio di seguro di auto.

Ya cu e medidanan anterior no a resulta suficiente, Ennia a scoge pa un enfoke nobo cu nan a anuncia na cliente individual y intermediarionan bao di e nomber "relacion total".

Punto di salida ta pa alcanza un relacion mas duradero y consecuentemente mas beneficioso pa tur envolvi.

Ennia ta ofrece cliente un serie di producto pa seguro pa pensioen y di bida y ademas e posibilidad specifico pa productonan di seguro contra daño, manera seguro contra candela di edificio, inte-

rior/kiebro, transporte, responsabilidad pa tercer (WA) y seguronan di auto, segun necesidad y moda financiero di esnan envolvi.

Aunke cualkier pakete di seguro ta diferente pa cada cliente, un cos sigur ta cu seguronan di auto no lo ta riba nan mes y cu cerca Ennia por sera seguro di auto unicamente como parti di un pakete total cu mas cu un seguro di Ennia.

Segun Ennia, como cu pa hopi aña caba e portofolio actual di seguro di auto ta hibando un perdida grandi, for di awor Ennia no ta saca polisa aisla mas pa seguro di auto.

Pesey Ennia ta ofrece cada cliente cu awor ainda tin

seguro di auto so na e compania, pa transferi otro seguro, cu nan tin cerca otro compania di seguro, pa Ennia pa asina cuminsa traha riba e relacion total.

Esnan cu pa ekis motibo no acepta e oferta, mester tene na cuenta cu e polisa di nan seguro di auto ta caduca e siguiente di prolongacion y cu esey lo caba na Maart 2001.

Naturalmente Ennia ta dispuesto, caminda cu por, pa yuda e grupo di asegurado aki den e proceso di transferencia di nan seguro di auto pa un otro compania di seguro, caminda lo inclui tambe e asina yama declaracion di "no claim", contal cu esey ta aplicabel.

TELEFONNAN DI DIARIO
826747- FAX 828551

ARUBA TA RICO!!

